



2023 – Sizhun 2

Stal c'hoari-roll

Ur wezh e oa, ur wezh ne oa ket met ur wezh e oa bepred rummad c'hoarioù frankañ ar bed, harz ebet d'an ijin e-kontrel d'an c'hoarioù-video pe kevredigezh boutin. Beajit dre ar bed hag an amzer, bevit taolioù-kaer hep en em lakaat en arvar, tennit gounid ag efedoù yac'hadel un c'hoari lec'h ma c'heller bout trec'h d'ho spontoù donañ. Kontit deomp penaos oc'h daet da vout Mitonig, hanter kazh hag hanter razh, e penn ur gang chiwawaed ; Sibernetika, Rouanez veur ar seizh hud pe c'hoazh Skrammus Filibus, an intent artifisiel a dennas ur garg nukleel er blez 2049.

“C'hoari-roll kreion ha paper, digor d'an HOLL. Dait da gontañ ha da vevañ un istor a-stroll. Sistem simpl ha dishañval bep mintin. Sistem donoc'h d'enderv, ar memes a-bad ar sizhun. Dibabet e vo ar sistemoù hag ar bedoù (faltazi, skiant-faltazi, bed gwirion...) doc'h c'hoant ar stajidi. Tro en do pep unan kas un abadenn.

N'anavezit ket an c'hoari-roll ? Skouerioù àr <http://troplongpaslu.fr/jeux-de-role-courts/>”

Evit piv ?

- Digor d'an holl, forzh pesort skiant-prenet ho pehe pe n'ho pehe ket.
- Daet e vo mat brezhoneg pep unan, sikour a ray dishañvalaat an tudennoù : gwir eo ne gomz ket elfed, korred, orked ha trolled tre ar memes parlant. Afer zo ag ur live B2/C1 ur sort.

Petra eo an c'hoari-roll ?

- Un c'hoari kontañ hag ijin un istor a-stroll eo. Un dudenn a zo da bep c'hoariour pe c'hoariourez a dapay plijadur é lakaat anezhi da vonet àr-raok, tapout skiant-prenet, kavout teñzorioù, savetaat pe distruj ar bed...
- Er memes skipailh e c'hoari an holl, àr-bouez ar mistr.ez. Mistr.ez an c'hoari a vo àr-un-dro o brasañ sikour hag o brasañ enebour ha eñ.hi eo a c'hoariay an holl tudennoù eil renk a gaver en istor.
- Mistr.ez an c'hoari a lak ur moull da bep tra, getañ.i e vez ar gwir atav, asantet, nac'het pe kemmet kinnigoù an c'hoariourion. Taolit evezh : gouest eo da gemm disoc'h un diñs get ur sell ! Get ar mistr.ez e vez savet steuñvenn hollek an istor... ha get an c'hoariourion ha c'hoariourezed e vo distummet a-grenn :)
- Mil mod a zo d'an c'hoari-roll. Genomp e vo c'hoariet er mod « kreion ha paper », doc'h taol pe er-maez pa vo kaer an amzer.

Pesort sistem ?

- Embannet zo bet kantadoù a sistemoù c'hoari a bep sort, berr pe hir, simpl pe luziet. Genomp vo graet an daou :
 - krogadoù paket brav dindan 1-6 pajennad reolennoù èl ma kaver da skouer àr <http://troplongpaslu.fr/jeux-de-role-courts/>
 - un abadenn binvidikoc'h àr meur a hanter zevezh doare Tiny, My Little Pony, Dungeons & Dragons, Warhammer 40,000 Black Crusade, Pathfinder, Vampire the Mascarade... Displeget e vo deoc'h pep tra, rit ket bil.
 - N'eus ket afer a anavezout ar bedoù meneget, graet e vo get ur sistem awenet get ar re a-us en ur bed ijinet genomp, reve c'hoantoù ar strollad c'hoariourion ha c'hoariouezed (faltazi, skiant-faltazi, istorel, bed a-vremañ, ukroniezh, utopiezh, distopiezh, siberpunk, steampunk, zombi, gourharozed, h.a.)

Program

- Dibabet e vo an c'hoarioù doc'h c'hoant ar berzhidi.
- Da vintin : un abadenn get ur sistem simpl nevez bemdez, un hanter zevezh seul gwezh, dibabet e vo ar mestr pe ar vestrez e-touesk ar berzhidi.
- D'enderv : un c'hoari pinvidikoc'h, ar memes bemdez, kaset àr pemp hanter zevezh.
- Tommet e vo ar c'horfoù hag ar speredoù get ur c'hard eur c'hoariva e penn-komañs pep abadenn.

Petra degas ?

- Peadra da skriv
- Roet vo deoc'h diñsoù a bep sort (pevar, c'hwec'h, eizh, dek, daouzek pe ugent tu dezhe)
- N'eus ket afer bout treuzwisket na livet, hogen ne vo ket nac'het naket

Pegen sirius eo an c'hoarioù-se ?

Amañ emañ bravitez an c'hoari-roll : doc'h youl ha temz-spered ar berzhidi e vo pep tra. Plas a zo evit fent, feulster, from, karantez ha razh. Unan pe egile, ha memes an holl àr-un-dro. Skouerioù :

- Ur c'hrennard pe ur grennardez kollet en ur greizenn genwerzhel iskis ha difin.
- TeleTrashLive
- Istor mignoniezh etre un den hag ur c'hi.
- Tapet oc'h en ur gwallhuñvre, seul taol ma varvit e krog ar gwallhuñvre adal ar penn-kentañ. Deoc'h da gavout an tu da vonet maez.
- Ur strollad perc'hinerion é heuliiñ un hent arvarus. E penn an hent e c'hellint en em zizober ag o c'houstiañs re bounner.

- Daou sorser o deus bevet un istor karantez tener, 30 vlez zo. Unan zo bet da foetiñ bro, egile da studial e levrioù. Kejiñ a raont en-dro. Petra o devo da lâret, an eil d'egile ?
- Tavarn. Da gustum e kej eno an harozed hag harozezed a-raok monet da ziskoulm o c'hefridi. Hiriv enta e chomint en davarn.
- Doueed ha doueezed é varniñ eneoù ar re varv
- Emañ ar beajour pe ar veajourez àr-nes kuitaat h.e re. Petra a lâray dezhe ? Pesort envorennoù a leuskay àr h.e lerc'h ? Pesort hetoù a c'hellint lakaat da zonet da wir ?
- Ken lan eo an ifern ma strew e euzhviled àr an Douar.
- Marvet eo ar roue pe ar rouanez. Dav vo dibab un hêr pe un hêrez nevez ha buan, a-raok bout taget get hon amezeion.
- Marc'hadour traezh an emzivadad.
- Robodoù hanter vourdet àr ur blanedenn divuhez
- Adeptout mod d'ober un abadenn skinwel : Kastell Boyard, Etrekêr, Bourrapl ar verdeadenn, Koh Lanta, Enezenn an temptadur, Er pradoù e kaver karantez, ar Vouezh, Ar bidoc'hig dizimez, h.a.

-
- **EVEZHIADENN** : Pleustret e vo war an danvez-se bemdez eus 9 eur betek kreisteiz hag eus 2 eur betek 5 eur goude kreisteiz, a-hed ar sizhun.
 - Ar stajidi o devo dibabet mont gant ur rummad diouzh temoù ne c'hellint ket kemer perzh er c'hentelioù brezhoneg kinniget diouzh live an dud.